



FAAVAEINA 1839

O LE SULU SAMOA

NOVEMA 2018

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

Su'esu'ega i le Tusi o Kolose

Saunia e
Silipa Silipa
Matagaluega a Apia

O le Ekalesia i Kolose

O le aai leni o Kolose o loo i le itu i sasa'e o Efeso, pe a ma le 10 i le 12 maila le mamao mai Laotikaia ma Iarapoli. O le aai o loo taatia tonu i le fetaula'iga o auala, e masani ona uia e tagata faipisinisi i taimi o fefaataua'iga. O lona uiga, o taimi ma aso uma lava

Mafaufauga i le Aso o Tama

tusia e
Afemata T. Apelu Aiavao
silasila itulau e 12

O le Tamaloa ma Lana Asini

“Afai foi e fai ane se tasi se upu ia te oulua, ia oulua fai atu, e mana'o iai le Alii, ona tuu loa mai ai lea e ia.” - Mataio 20:3

faaaauau itulau e 8

Osiga Feagaiga EFKS Malua Seattle ma le latou Faifeau

faaaauau itulau e 5

e vaaia ai tagata malaga itotonu o Kolose; ma faamauina foi, o se tasi leni o aai tele ma taua i na ona po, ae ua mou malie atu ma ua avea o se aai faatauvaa, ua tau leai sona taua ma sona aoga. Ua faamauina foi o se tasi leni o aai

e le'i mafai ona afea e le aposetolo, a o iai i ana malaga faamisionare.

O le tusi la leni a Paulo ia Kolose, o loo faamauina na tusia i le vaitaimi o le 60 - 65 tausaga,
faaaauau itulau e 2



Maafaamanatu o le Faama'i Tele 1918, manisi o tuugamau na teu faatasi ai le toatele o tagata na maliliu - Vaimoso, Faleata.

Faamanatu le 100 Tausaga o le Faama'i Tele 1918

O le masina nei na faamanatu ai e lo tatou malo ma le atunuu le 100 tausaga talu ona tupu le Faama'i Tele (Faama'i Oti), i le lalolagi, lea na maliliu ai le 22% le aofa'i o tagata o Samoa, ae silia ma le 50 miliona tagata o le lalolagi na maliliu ai. Fai mai o Samoa e aupito sili pasene o ona tagata na maliliu ai pe a fuafua atu i le faitau aofa'i o ona tagata i lea vai taimi.

O le Faama'i na oo mai i Samoa ona o le vaa mai Niu Sila, o

faaaauau itulau e 7

Kerisiano Sauaina i le Lalolagi

O le Malosi le Matineia o le Alofa - (Ehsan - Iraq)

I le aai o Erbil (Epili) i le itu i matu, o le savili ua na faataavaleina manogi malolosi o le asu o afi ma lapisi pala o le aai gaosimea. O le

manogi foi o kuka o meaai i ta'igafi i fafo o fale o aiga, ua fafaguina mai le isi aso fou i lana moe, ma
faaaauau itulau e 3

Su'esu'ega i le Tusi o Kolose

mai le itulau muamua
talu ona mae'a le maliu o le Alii Faaola, ae na tusia mai totonu o le falepuipui i Roma.

Ua toatele tagata su'esu'e o le Tusi Paia ua taliaina, o le tusi i Kolose, na tusia lava e le aposetolo o Paulo, faatasi ma le fesoasoani a Timoteo lona soo. O loo iai foi nisi o su'esu'ega e faapea na tusiaina e Timoteo le tusi, ae faaupuina e Paulo, o lona uiga o le lima o Timoteo na tusia ai, a o upu ma mafauauga o le aposetolo.

E 13 tusi na tusia e Paulo o loo faamauina i le Feagaiga Fou. O le tusi o Kolose, o le tusi mulimuli lea na tusia mai le falepuipui, "prison letters". O tusi uma nei o loo matamata tetele ai le faamoemoe, ma le molimau maumaututu, ia faamalosi i le galuega ua valaauina ai i tatou, e ala i le Ekalesia ua faavaeina e le Atua.

O le tusi foi lenei, na tusia mo le 'au faatuatua, ma le 'au talitonu o loo nonofo ma aumau i Kolose, ma le faamoemoe e mafai ona faasafua atu ma le au faatuatua ma e ua talitonu ia Keriso Iesu, o loo nonofo i Laotikaia ma Iarapoli.

Mafuaaga o le Tusi

A o iai Paulo i le falepuipui, o le taimi lea ua amata ona malosi le tuputupu a'e o a'oa'oga sese i totonu o Kolose, ma ua avea o se tulaga ua afaina ai le Ekalesia, e tusa ma le molimau a Epafara.

Ona o le faamamafa ma le mataupu silisili o le tusi o Kolose, o loo ogatotonu ia Iesu Keriso i lona itu faaletino/faaletagata ma ana galuega, o le mafuaaga lea o le finau malosi o le aposetolo o

Paulo, ina ia tineia aoaoga sese o loo fesiligia ai poo ai Iesu Keriso, a o le a foi sona taua ma sona sao i le olaga o le tagata Kerisiano i aso fai soo. O le naunauta'iga o le aposetolo, ia aua nei aveeseina le taua ma le sao aoga o le Alii o Iesu Keriso i le olaga o le tagata soifua. Ae ona o tapuaiga i lea itu lalolagi o loo tapuai i atua pei o Saeuse (Zeus), Apolo (Apollo) ma isi, pei o i tonu lea o loo maua mai ai mafauauga o tagata ma fafau ai o latou lava talitonuga e ola ai i aso uma. Ae o le tulaga faigata i le aposetolo, ona o tagata Iutaia o loo nonofo i Kolose o loo iai o latou talitonuga, o Iesu e le mai le Atua.

Ona manatu lea o Paulo ua tatau ona faatopetope ona tusia se tusi ma momoli atu i tagata o le Ekalesia i Kolose. Ua le gata e faafetai ai i le tumau pea o lo latou faatuatua i le Atua, ae lapata'ia ai foi latou e uiga i aoaoga sese, ma manatu faatu'iese i aoaoga masani faatapuraiga ia ua amata ona alia'e mai, ina ne'i liliu ai o latou loto ma mafauafau i le potu fou lea ua amata ona ofi mai i totonu o le Ekalesia.

Suesuega Kolose 2

Vaega 1: O saafiafiga o le aposetolo ia Kolose (fuaiupu 1-5)

O le amataga o le mataupu e 2, o le faaauauina o le mataupu 1, fuaiupu 24-29. O loo aumaia ai le naunauta'iga o le aposetolo ina ia faatumauina pea Kolose i le lelei sa iai mai le amataga. Ia faaauau pea le lelei o le mafutaga ma le Atua, ma ia saga faatumauina, e ui e le o faatasi i latou ma Paulo i la le tino, a o le agaga atoa o le

aposetolo o loo ia te i latou.

Ae faapefea ona faatumauina? Ia faamafanafanaina loto, faasooina i le alofa, ia maua le oloa o le mautinoa i le loto matala, o le potu ma le malamalama. Aua nei faaseseina i upu faa'ole'ole, faaauau le nofo lelei ma le fealofani, ma ia mausali le faatuatua ia Keriso. O le naunauta'iga lea o le aposetolo mo Kolose. Ua le gata i mafutaga i totonu o aiga, le mafutaga i totonu o Ekalesia, ae sili ai le mafutaga ma le Atua.

Vaega 2: O le atoaga o le ola, o loo ia Keriso lea (fuaiupu 6-19)

Ua logotala le aposetolo i manatu faatu'iese i aoaoga masani faatapuraiga, lea ua amata ona aga'i mai i le Ekalesia i Kolose ma ona tagata lotu. O le ala gaua'i lea o Paulo se'i aveese ma titina faaososoga ua amata alia'e mai i tagata tapua'i, o le potu le aoga e faasese ai, o uputuu a tagata, faapea aitu o le lagi ma le lalolagi.

Ua galue malosi Paulo se'i faamanatu, ma tuu i loto o tagata, e mati'eti'e ma tulaga ese le maualuga o le Silisili Ese ma le atoatoa o Keriso. O le toe tepa i tua poo le toe fo'i i tua i le olaga tuai sa iai, o le tausia lava lea o tulafono sa ola ai le Eperu, aemaise lava le peritomeina, o le tu ma le aganuu lea o loo mulimulita'i ai le au faresaio.

A faitau lelei i le mataupu, o manatu faatu'iese i aoaoga masani faatapuraiga lea ua alia'e mai i Kolose, ua o se fili o loo taamiloilu mai tua ma lona naunauta'iga, ia pu'e ma mailei tagata Kerisiano.

faaauau itulau e 5

O LE LAUGA

TUSI FAITAU:

Kenese 32: 16 – 22

Mareko 1: 1 – 8

MATUA: Mareko 1: 1

“O LE AMATAGA O LE TALALELEI IA IESU KERISO O LE ALO O LE ATUA”

MANATU AUTU:

FAALAULELEI LE ALA

O se manatu ‘autū e faigofie ona malamalama iai. Aua foi o nofoaga o loo tatou nonofo ai. E iai auala laulelei, e iai foi auala omoomo, vaivaia i taimi o timuga ae pe fui taimi o mugala. E le faigofie mo tagata ma taavale feoi.

E iai moomooga o le loto ina ia faaleleia ia auala. Aua o le natura lea o le tagata soifua. E manao e faatino i se taimi vave mea e manao ai.

E faapea se ata tatou te maua ile Evagelia a Mareko. O Mareko o se Misionare sa galulue faatasi ma Peteru ma Paulo. O lana tusi na tusi ai totonu o Roma, i popofou o le maliu faamaturu o Peteru. Pe tusa ma le 35 tausaga talu ona toe soifua mai Iesu mai ile tuugamau. E ‘au’au faatasi le toatele o le ‘au su’esu’e i le Tusi Paia. O le Evagelia lea na muamua ona tusia. E iai foi manatu maumaututu, na faaaogaina e Mataio ma Luka, e fai ma faavae o la tusitusiga.

Ua ou taua lea tulaga ia Mareko, ona e iai le feau faanatinati, o loo taumafai le tusitala e faata’alise ona molimoli atu i le ulua’i Kerisiano i Roma.

O le feau faamalosi ma le lototele ona o sauaga a le Tupu o Roma i ia ona po.

O le feau faala’ei’au ina ia tutumau le faatuatua i le Keriso Manumalo.

O le agaga maualuga lea o Mareko, ua leai ai se taamilomilo o lana molimau. Pe taumafai e fai se faamatalaga umi i le tupuaga o Iesu.

Peitai o uluai upu lava o le tusi a Mareko. “O LANA TA’UTINOGA FAA-LE-FAATUATUA”

O le amataga o le Tala Lelei ia Iesu Keriso o le Alo o le Atua. Ua lava ma totoe ulua’i ‘upu ia a le tusitala e faamatala ai le tusi atoa. Afai foi tatou te tu’ufa’atasia le Tusi Paia i se fuaiupu e tasi.

Ua alagatatau ai foi uluai upu ia a Mareko. Sei tatou vaavaai lava i uiga loloto o upu tomua a Mareko.

O le upu Keriso i le Gagana Eleni, e tutusa lelei ma le upu Mesia i le gagana Eperu. O lona uiga, “**O lē ua faau’uina.**” O le faasuafaina la o Iesu i le suafa Keriso, faatoa faia ina ua toe soifua manumalo Iesu mai i le tu’ugamau. Ma ua

faaaauau itulau e 4

O le Malosi le Matineia o le Alofa - (Ehsan - Iraq)

mai le itulau muamua

tagata sulufa’i mai taua ma sauaga. E anoanoa’i foi tagata e lalafi mai le timu ma matagi, i faapaologa o falesa ma fale malepelepe pe ua tuufua foi ona ua sosola tagata mai sauaga ae tia’i a latou meatotino, e pei o fale ma mea uma o iai i totonu. E tasi le itula sa ou ti’eti’e ai i la’u taavale aga’i i le aai tele o Mosul mai le faoa’a’i o Epili. O Mosul o se aai Moselemu; o Epili e toatele ai tagata Take ma tagata sulufa’i mai Peresia, Irak ma Suria.

O le siosiomaga lea sa tatalo leleoa ai Asara ma ia ta’ua le mataupu e uiga ia Iesu i ana uo Moselemu. Na talanoa ma Esani i se taimi ua mavae e uiga ia Iesu, ae le’i talia e Esani le Tala Lelei ia Iesu. O le fesili a Esani, “E

faapefea ona avea le Atua, e pei ona e fai mai ai, ma Atua toe avea ma tagata?” O le tali a Asara e le’i faamalieina ai Esani. “Sa fasiotia foi e Kerisiano tagata Moselemu i le taimi o taua pa’ia o ‘crusades’. Ma o tagata Kerisiano ou te iloa e faagutugutulua, latou te laugaina mai le ola mama, a o le palapala ia o o latou olaga.

E malamalama lelei Asara i tagata amioletonu ma faagutugutulua oi le Tusi Paia ma lapata’iga o loo fai faatatau iai, e pei o le au faresaio e le savavali i mea latou te laugaina. Fai mai Asara, e matua le taliaina e le matou faatuatuaga le ituaiga amioletonu lea e te tautala iai. E le o tagata uma foi latou te fai mai o latou o Kerisiano, o ni tagata e talitonu ma le faamaoni.

Sa faaaauau pea ona tatalo Asara mo lana uo i le vai taimi ua lolofi atu ai le au faatupu faalavelave ma latou faatuina se malo Isalama e faavae i luga o tulafono ma talitonuga faa-Isalama. Na latou fai foi se tuutuuga mo tagata Kerisiano sa nonofo i Mosul: liliu i le tapua’iga Moselemu, totogi se lafoga matua’i tele lava, o ese ma le aai, poo le fasiotia o latou.

O le toatele o Kerisiano i le taimi lea na sosola i le nuu o Kurdistan i Iraq, o loo malosi ai le fesoasoani a Kerisiano i tagata sulufa’i Suria ma Iraq. O isi na sosola i Epili. O Asara ma isi Kerisiano na latou faia le mea na valaauina ai i latou e le Atua, o le fesoasoani lea i tagata sulufa’i. O taga pepa ‘i’ila na latou faatutumuina i meaai, lavalava, ma fafao atu ai ma Tusi Paia.

I se isi aso na fesili ai Asara ia Esani pe fia fesoasoani i le galuega

faaaauau itulau e 10

O LE LAUGA

taunuu ai le Mesia folafolaina i le Feagaiga Tuai.

I le ma lea, ua ta'ua foi e Mareko, **“O IESU O LE ALO O LE ATUA.”** O le Atua liutino tagata ua afio ifo ma soifua faatasi ma tagata.

Sa fia inu, sa fia 'ai, ma lagona uma faa-le-tagata. O ia foi sa fa'aalia ai le alofa silisiliese o le Atua i le lalolagi. Ua manatu Mareko, sei mulimuli lava ona auilili le soifua galue o lo tatou Alii Faaola.

Ao ana upu tuusa'o: O le feau tuusa'o.
O le feau faa-la'ei'au.
O le feau faatupu malosi.
O le feau i le faatuatua.

Na te'a uma iai le lototele, e fetaia'i ai ma faafitauli o loo aafia ai le au Kerisiano. Aemaise ai faiga faamata'u a le malo o Roma faapea taitai o le tapuaiga faa-lutaia.

O ai la a toe palaai?
O ai la a toe solomuli i le faatuatua ia Iesu?

Pe a fai ua tautino e Mareko i le amataga. O le Mesia poo le Keriso na valoia. O le ua toilalo ai le oti. O le Alo o le Atua, na te togiolaina le lalolagi uma, o le ola e faavavau ma i latou e tumau le faatuatua.

E leitioa molimau le Tusi Paia. Tiga le 'a'asa o sauaga, ae atili ai ona tupu le Ekalesia Kerisiano. Ua silafia lelei lava e Mareko. **“OLE TALALELEI IA IESU KERISO LE ALO O LE ATUA”**. Na te faalauleleia ala o le tagata. Na te saunia o tatou loto e talia le Tala Lelei. Aua foi, a talia le Keriso i o tatou loto. Fai mai Paulo – **“O otaota mea uma o le lalolagi”**. O se foi ua ia Keriso, o le tagata fou ia.

I le ma lenei, o lota avea ma so'o moni o le Keriso. Ia atagia i o tatou ola i aso uma. O le molimau ola lena, o lota ola faatuatua ia te ia.

E ui lava ina ogaoga ma oona faiga faatogafiti a Iakopo ia Esau lona uso, ma iu ai ina faoa le tofi ole ulumatua. O le mataupu sa faitauina, ua tatou mautinoa ai le naunautai o Iakopo, e faalaulelei lo la vā ma Esau. O le tagata ua iloa lona sese, ma ua salamō. Ua iloa lelei e Iakopo, e manino lana vaai i le Atua pe afai e faalelei lona vā ma lona uso.

E leai se manatu e faaleaoga meaalofo na saunia e Iakopo. Peita'i o le agaga ua tupu ae sei toe teuteu ma fausia se mafutaga mafanafana faa-uso. Aua foi, o le a lava lo tatou tautino, tatou te alofofa i le Atua, ae tatou te ita i o tatou uso. Ua lē aoga lea i luma o le Atua.

O le mau a se tasi o faiaoga o le Mata'upu Silisili o D. Bonhoffer i Siamani, taimi o le sauāina o tagata Iutaia (Jews) i faigasauā a Hitila. **“E iloa le Atua i le vā feso'ota'i ma le isi ou uso-a-tagata.”** O lona uiga ia iloa lou alofa, onosai, faapalepale, fetausia'i, feagaleleia'i le vānonofo ai ma isi ou uso-a-tagata.

Le paia o le Ekalesia e pele i le loto ma le agaga; o 'upu fa'ala'ei'au a Mareko i Kerisiano i Roma. O upu faala'ei'au foi ia e tomatauina ai lo tā ola faatuatua ile Atua. **“OLE TALALELEI IA IESU KERISO LE ALO O LE ATUA”** O le Tala Lelei na te soloia pāvaeloto o le faitaga'i ma le fefulituaa'i. Na te saunia faale-agaga o tatou loto a o tatou aga atu e faamanatu lona aso soifua i lenei foi tausaga 2018.

I le ma lenei, na te faamalosia lo tatou ola galulue i soo se vaega, e faaaogaina ai o tatou tagata mo sona viiga. Ua le pō se lilo i le tele o galuega oloo feagai ma le tatou Ekalesia, faapea foi galuega o le toe faaleleia o le Ioane Viliamu ma lenei foi vaitau o le feagai ai ma faiga Taulaga a le Ekalesia.

Ua e pagātia, ua utiuti foi lau faasoa. Peitai ua silafia e le Atua ia galuega lelei uma. E tupu pea le malosi, e foai pea e le Atua le tamaoiga i o outou aao ma o'u lima, e atia'e ai lana galuega i le lalolagi. Amuia i tatou, pe afai e moni lo tatou avea ma ona soo, pe afai tatou te tautino faatasi ma Mareko.

Ua faamauiina foi e Mareko nisi o fetalaiga tuusa'o a lo tatou Alii Faaola e uiga i lo tatou ola faatuatua.

“A 'e fia mulimuli mai ia te a'u, ia faafiti o ia ia te ia, ma ave lona satauro, i le mulimuli mai ia te a'u. Auā ai se fia faasaogalemuiina lona ola, e maumau ai ia te ia. A o le faamaumau lona ola ona o a'u ma le Tala Lelei, e faasaoina e Ia. Auā se ā le aoga i le tagata, pe afai na te maua le lalolagi uma, ae maumau ai lona ola.” {Mareko 8:34-38}

“Afai e fia muamua se tasi, e avea o ia ma mulimuli i tagata uma, ma auauna a tagata uma.” {Mareko 8:35}

“Aua foi, o le atalii o le tagata na le sau o ia ina ia auauna tagata ia te ia, ae peitai ia auauna o ia, ma foaiina atu lona ola, o le togiola mo tagata e toatele.” {Mareko 10:45}

O le ata manino lena o le soifua sasa'a mai o Iesu Keriso. Na faatinoina i le satauro matagā ma le faalumaina. O lona maluu ma lona toe soifua manumalo. O lo tatou manumalo foi lea faatasi ma Ia. Pe afai e moni lo tatou talia o Ia i o tatou loto.

Manuia ona o Iesu. AMENE.

Saunia: Elisaia Kolia (FS)
EFKS Matautu-uta
Apia

Osiga Feagaiga a le Aulotu (EFKS Malua Seattle) ma le latou Faifeau

O le Aso Faraile 24 Aokuso 2018 i le itula e 3 i le aoauli na feiloa'i ai aiga na lua ma le Aulotu EFKS Seattle, ma faia faaaloaloga a aiga e lua o le faifeau ma lona faletua mo le aulotu. Ua mae'a ona faatulaga ai lea o le matou polokalame mo le Aso Toona'i e osi ai le feagaiga.

O le aso lea, Aso Toonai 25/8/2018 taimi Amerika i le 10 i le taeao na faataunuina ai le sauniga lotu o le osiga o le Feagaiga a le Aulotu (EFKS Malua Seattle) ma le latou faifeau le Susuga ia Rev. Hector Panama Pouono ma le faletua ia Herem Pouono, o le sauniga na ta'ita'ia e le Faifeau Toeaina o le Pulega, Susuga Selulo Lagoo.

O le Failautusi o le Pulega sa fofogaina afioga a le Atua. O le lauga muamua na saunia e le Susuga ia Rev. Frank, a o le lauga e lua na saunia e le Susuga i le Faifeau Toeaina o Kolia Kolia o Sini Ausetalia, ma le upu faapoopo a le ta'ita'i.

O Susuga i Toeaina ia Andy Leavasa ma Kolia Kolia sa faaee o la 'a'ao i le faifeau ma lona faletua ma faaiu ai le sauniga i le tatalo faamanuia na saunia e le Ta'ita'i, sosoo ai ma le Faamanatuga na ta'ita'ia e le Faafeagaiga ia Rev Hector Panama Pouono, mae'a lea ona valaau faaalolalo ai lea o le aulotu. Sa fai ai le Susuga i le Ta'ita'i Tiakono ia Unutoa e faasee ane le pa'ia o le sauniga i le Hall mo le taumafataga ma faauma ai le polokalame o lea aso fiafia tele o le aulotu.

O viiga ma pese sa saunia lava e le aufaipese a le Ekalesia (EFKS Malua Seattle i lalo o le ta'ita'iga a le Susuga i le Tiakono poo le Faipese Talaau ia Fereti.

Ua maea le taumafataga ona alo ai lea o le aulotu ma aiga na lua i faaaloaloga o lea aso. Ua faamalo faafetai. Ma faaiu ai i le sisiva o aiga na lua faatasi ma matafale uma o le aulotu. Ua fiafia ua tau lau o lo latou faamoemoe sa tuu i

le Atua, ua maua le latou faifeau. O le aulotu leni o loo iai le Tiakono Toeaina le Susuga ia Ava. Sa vaia lava le laufofoga fiafia o le aulotu i le mafutaga puupuu, ai ona ua taunuu la latou miti ua leva o faatali iai mo sa latou faifeau. Manuia le galuega lau Susuga i le Faifeau, le faletua ma le fanau. Faamanuia le Atua i le Tiakono Toeaina ma le mamalu o le Aulortu.

Aiga tama o le Susuga Hector, o Apia ma Siumu. Aiga tina o Hector, o Pago Pago ma Vatia, Amerika Samoa.

Aiga tama o le faletua ia Herem, o Ava o ma Safua. Aiga tina o le faletua ia Herem, o Uafato, Sapapalii, Vaiala ma Fogapoa.

saunia e

Fata Laauli Kalauta

Mourning Faanoanoa

*Joy is gone from our hearts;
our dancing has turned to
mourning (Lamentations 5:15)*

*Ua mavae le fiafia o matou
loto; ua liua la matou siva ma
faanoanoa (Auega 5:15)*

*You turned my wailing into
dancing; Psalm 30:11.
Ua e liua lo'u tagitu'i i le siva
(Salamo 30:11)*

*A time to mourn, and a time to
dance. (Ecclesiastes 3:4)
O ona po e tagi ai; ma ona po
e 'ata'ata ai. (Failauga 3:4)*

Su'esu'ega i le Tusi o Kolose

mai le itulau e 2

I le fuaiupu e 8 o loo aumai ai se lapata'iga a le aposetolo.

I upu amata o le fuaiupu, o loo faapea mai, "Ia outou", ua faaliliuina mai i le upu Peretania o le "I see" poo le "to beware of, to watch out for, to pay attention to", o le faaliliuga lea o le upu Eleni "blevpete". O lona uiga, ia a'oa'o'oina e tapena ma sauniuni i mea matautia ma ogaoga o le a tutupu mai le lumana'i. Ou te

talitonu e leai se eseese ma lapata'iga ma sauniuniga mo matagi malolosi ma afa o le a oo mai ma aafia ai le soifua ma le ola o tagata. E tatau i soo se tagata ona nofo mataala, nofo sauniuni, ma ia aua le manatu mama i itu uma.

*Le Atua e, e faapei ona
naunau o le aila i vaitafe, o loo
faapea ona naunau o lo'u
agaga ia te oe. - Sal. 42:1*

Tuaiti Laimeni Muti 1837-1899

DWIGHT LYMAN MOODY

O le Faifeau e le'i Faauuina Aupito Logologoa

O le 'Au Toe Faaolaola

faaauau mai le masina o Oketopa 2018

Ua malaga mai Linikone le Peresitene o Amerika e asiasi i le galuega a Tuaiti

E oo mai i le tausaga e 1860, o a'oga o le Sapatu (Sabbath schools)ua tuputupu a'e pea seia oo i le 1,500 i latou e a'o'oga ai i lalo o le ta'ita'iga a Tuaiti. E oo lava i le Peresitene ua faatuina mo le palota, o Aperaamo Linikone na ia asiasia le a'oga i lana asiasiga muamua i Sikako ina ua mae'a le palota ia Novema, e aloa'ia ai le galuega lelei o loo faia e le a'oga. Ae na ia faaalua muamua, o le a asiasi i le a'oga, pe afai e le valaauina o ia e fai sana lauga. Na ioe iai Fauele (Farwell) i lea tuutuuga. Ae o Tuaiti e faigata lava ona taofiofia i mea e mana'o iai. Ina ua foliga mai o le a tuua le a'oga e le peresitene, faailoa mai loa e Muti Tuaiti, "Afai e le finagalo Linikone e fai sana upu a o le'i ia tuua le a'oga, o le mea moni o le a faalogologo uma pea taliga o tagata." Na savali atu Linikone i le ogatotonu o le potu e foliga mai o le a ia tuua le a'oga, ae te'i ua tu ai, ma fai lana lauga e fetau lelei ma lea aso o le A'oga Aso Sa, ma ia ta'ua ai lona aiga ausage na ola a'e ai. O ana toe upu i le a'oga, "Faalogo lelei i o outou faiaoga, ma galulue ma le filifiliga e fai mea latou te faatonuina mai ia outou, e oo lava ina avea se tasi o outou ma peresitene o le Iunaite Setete i se aso e pei o a'u, aua o lea ua tele avanoa tou te maua i lo le mea na ou iai a'u." O nai masina mulimuli ane, ina ua valaau Linikone mo ni

volentia se 75,000 e fesoasoani i le lavea'iiga o le Iuni, e to'a 75 tama a'oga sa iai i lea aso, na latou ofoina atu i latou mo le taua o le Iuni; ma o i latou ia o nisi o le atunuu na uluai ofoina atu lo latou ola mo lea faamoemoe.

Ua ofoina atu nei lona ola atoa mo le Misiona

Ina ua amata le taua faaleatunuu, (civil war) na amata ai foi ona tauivi Tuaiti ma ona foi lagona. Ua ia manatu ua tataua ona ia tuua le pisinisi, ae tuu atoa lona taimi i le galuega a le Alii. I tausaga mulimuli ane na ia tautala ai i lea mataupu, ma isi foi mataupu, fai mai sa ia lagona o loo valaau le Atua ina ia faaopoopo ana galuega e fai e fesoasoani ai i le galuega.

Fai mai a ia, "O taimi uma lava e valaau mai ai le Alii ia te au mo le galuega e sili ona taua, e fetaua'i lava ma mea ou te loto iai. Sa ou tetee iai, ae na oo ina faia le finagalo o le Atua ae tuu le mea na ou mana'o iai. Ina ua ou sau ia Iesu Keriso, o le taua le mea, i lo'u taumafai e tuu lo'u loto, ae fai le finagalo o le Atua. Ina ua tuu le pisinisi, ona toe vevesi foi lea o ou lagona mo le tolu masina, o lo'u tetee lava lea i le finagalo o le Atua mo a'u. Ae peitai ane, oi se mea a manaia, le tele o taimi ou te faafetai ai i le Atua, ona ua tuu lo'u loto, ae fai lona finagalo.

Ina ua te'a le fetau'iga o ona lagona ma filifili ai Tuaiti Muti e tuuina atu lona ola atoa i le galuega, na fai vave lava lea faaiuga e aunoa ma se vevesi. Na ia faaalua i lona falefaigaluega lana filifiliga ua fai,

logo foi le loomatua e ona le fale o nofo ai o le a faamuta lana lisi ma tuua le fale. Ona amata ai lea ona ola mativa i le tau faasoasoina o ana tupe. Ina ua faalogo Farwell (Fauele) e faaputupu e Tuaiti ona nofoa ae moe ai i luga, i le fale o le YMCA, ona ofo mai ai lea o lana fesoasoani, i soo se taimi na te mafai ai. Ae na popole Tuaiti i le malolosi o ona talitonuga, ma le leai o se galuega e maua ai se tupe, ne'i avea lea ma mea e musu ai Emma Revell ia te ia. Ae leai! Ua ia folafola mai lona lagolagoina o Tuaiti i ana fuafuaga uma. Na fai lea ma mea e mafanafana ai lona loto, ma faamoemoe e fai Emma ma ona to'alua i se aso.

O le sagai atu o Tuaiti Muti e amata lana galuega mo le Atua e matua mata'ina lava mo le taule'ale'a e 24 ona tausaga, aua o se Kerisiano e le'i faauuina mo le galuega, pe iai foi sona pulelaa e fai ai ana lauga, vagana ai le misiona ua ia faatuina i le "The Sands". Ma o le mea moni, i tausaga uma o lana misiona, e le'i faauuina o ia e fai ma faifeau. E le'i faamoemoe o ia mo se galuega tumau i se aulotu e totogia ana pili. O lana a'oga o le faalogologo lea i a'oga o le Tusi Paia i soo se mea na te maua ai, ma fesilisili foi i faifeau popoto i mataupu na te le malamalama ai "O le a le uiga o le mea lea?" "E faapefea ona e faamatala le mea lea?" Sa loto maulalo lava e saili i faifeau lelei ma le popoto mea na te le malamalama ai.

O lona agaga, o lona galue lea i soo se mea e mana'omia ai o ia, ma o le YMCA (Young Men's Christian Association) le faalapotopotoga muamua na ia filifilia. Na vave lava ona tofia o ia e le YMCA o le latou misionare mo le aai, ma na vaaia a latou faletusi ma fai foi o ia ma pule. E leai ni tupe a le YMCA e totogi ai o ia, ae o le mea moni na te le'i talia se tupe, ae na ia matua fiafia e fai le galuega. O le tausaga e 1861 na

Faamanatu le 100 Tausaga o le Faama'i Tele 1918

mai le itulau muamua

le "Talune", sa iai nisi o lana pasese sa maua i le "Flu" lea sa pipisi i ia vai taimi i le lalolagi. Aisea na faataga ai e Niu Sila lea vaa e ofi mai i Samoa? Sa tatau ona le faatagaina e pulega a le Malo o Niu Sila sa latou tausaga faakolone Samoa i lea vai taimi, le vaa e ofi mai i Samoa, pe taula foi i le taulaga i Apia, aemaise lava, sa le tatau ona faatagaina nisi o le pasese e tulaueleele i Samoa. Faatusatusa lea ia Amerika Samoa.

Na logotala loa Amerika Samoa i le faama'i, ona faasa loa lea e la latou pulega, ona toe ofi ni vaa mai fafo i le teritori o Amerika Samoa. Ma o le mea na tupu, e aunoa ma se isi o Amerika Samoa na malii i le Faama'i, ae tusa o le 8,500 tagata o Samoa i Sisifo na malilii ai i masina e tolu pe fa na sasao faaafi ai le faamai i le atunuu.

Ua tanu faatasi nisi o malii. E saili atu le 'au tanu malii, ua malilii foi latou. E su'e atu se faifeau e faia le lotu, ua leai nisi ua malilii. E le mailoa pe toafia

nisi na teu i o latou tuugamau e aunoa ma ni o latou lotu e faia. E le mailoa foi pe to'afia ni faifeau na malilii. Ua maua tagata i le fefe ma le fememea'i. Ua manatu tagata o le lalolagi i lea vai taimi, ua oo mai le i'uga o le lalolagi.

O le Faama'i lea na motusia ai le tele o gafa o aiga o le atunuu, ma amata faaletonu mai ai soloa'iga o nisi o 'aiga, ona ua faamatapoto e nisi sa nonofo i aiga, o latou gafa, ma tau saili ai poo ai suli moni a o ai e le ni suli.

Na tuua'iina ai Niu Sila i lona manatu mama i le Faama'i, faailoga tagata, faailoga lanu, ma lona le talia o nisi o fesoasoani na ofoina mai fafo e fesoasoani i le tau taofiofia o le Faama'i.

O le sauniga o le faamanatuina o le Faama'i Tele 1918, lea na faia i se maa faamanatu ma nisi o le tele o tuugamau o e na malilii o loo i le alalafaga o Vaimoso i Faleata, e tatou te manatua ai ma le alofa le toatele o nisi o o tatou aiga na malilii, ma faamanatu mai ai foi ia i tatou, le tatau ona tatou nofo

sauniuni ma tapenapena mo mala faapea e ono tulai mai, ma tatou mafatia ai, ma malilii ai. Ia iai pea sa tatou tapenapenaga e fai mo tulaga faigata faapea e oo mai. E le gata i Faamai tetele faapea, a o fesoua'iga leaga o le lalolagi ua aliali mai e eseese ma o tatou talitonuga i mea e maua ai le filemu ma le manuia mo tagata uma.

E le ma iloa pe fia ni alalafaga o fai pea ni a latou lotu faamanatu o le Faama'i Tele 1918. Ae sa tele lava nuu sa fai a latou lotu i tausaga uma, e faamanatu ai o latou tagata na malilii. Sa fo'i tagata i o latou nuu moni, pei o tatou o aumau i le talafatai o Apia, e tatou te foi i nuu tatou te o mai ai i Samoa, ma tatou faamanatu faatasi le Faama'i ma o tatou tagata o nonofo pea i o tatou nuu. Sa manaia foi lea faiga, aua sa feiloai ai aiga ua leva o ta'ape'ape, ma talatalanoa i mataupu tau i le aiga, ma ni atiina'e e tatau ona fai mo le manuia o le aiga.

Tuaiti Laimeni Muti 1837-1899

DWIGHT LYMAN MOODY

O le Faifeau e le'i Faauina Aupito Logologoa

O le 'Au Toe Faaolaola

fai ai e le YMCA le a'oga a Tuaiti Muti (A'oga o le Sapati) ma a latou a'oga, ma lana North Market Hall Mission ua faaopoopo ane e fai ma lala o le a'oga. Ua fai foi le YMCA ma mea e moe ai Tuaiti Muti, ma faasao ai ana tupe sa ono alu i le tologiina o se fale maototogi e nofo ai.

O le Taua Faale-Atunuu (Civil War)

A o vevesi Tuaiti Muti i ia fesuia'iga e tele o lana misiona, a o le taimi foi lea o loo aafia foi le Iunaite Setete o Amerika i ona foi fesuia'iga faa-malo. Ua tosi e

Aperaamo Linikone le laina i le oneone ina ua tofia o ia e fai ma peresitene, e tapu ai ona toe avea se teritori ma setete e faataga ai ona fai o ni pologa (slaves). A o le'i faatautoina o ia e fai ma peresitene, ae o ese isi setete e fitu mai le Iuni. Ae uma lona faatautoga ae toe o ese foi isi setete e fa. Ina ua osofa'ia e le vaega faatu'iese le nofoaga o le ami i Fort Sumter ia Aperila 12, 1861, ona fai ai lea o le i'uga a le peresitene o Linikone e faasaga tau i le faatu'iese. Ona ia valaau ai lea mo ni fitafita. Na fesoasoani le YMCA i le faamaopoopoga o lea

itu, i le sailia o tupe mo le taua, meaa, auupega, ma solofanua e faaaogaina e fitafita, ae le gata i lea, o ni volanitia e avea ma fitafita. E tapena ia mea mo le taua, ae le'i tuua ai le galuega a Tuaiti Muti o le fesoasoani i le itu faaleagaga mo fitafita o le taua. E pei o le tufatufaina lea o tusipese 3500 i fitafita. E le gata i lea a o tama'i tusi o faamatalaina ai mataupu mai le Tusi Paia. E vevesi lava le taua ia, ae vevesi foi Muti e lauga ma fai lotu mo fitafita i mea o loo tolauapi ai. Ma e matua toatele fitafita na tuuina atu lo latou ola mo Keriso i ia sauniga.

O le mea mata'ina o le popole lea o volanitia ne'i uma le taua ae le'i maua so latou avanoa e tau ai.

mai le tusi: God's Generals,
tusia e Roberts Liardon,
faamatalaina e

Afemata T. Apelu Aiavao.

ITULAU MO TUPULAGA TALAVOU

O le Tamaloa ma lana Asini

mai le itulau muamua

Tatou te taunuu loa i le fale ou te iloa la'u mea ou te alu atu fai. E iai le tagata ou te fia fetui iai. Muamua atu ma lua o lua talanoa ma Maria, pe talanoa foi i mataupu silisili ma Paulo. Se'i ou afe ane i le mea lea o'u alu atu ai. Ou te fia talanoa i le tamaloa e ona le asini.

Ou te le iloa lona igoa, ou te le masani ai foi. E tasi le mea ou te iloa, o le mea na ia tuuina atu. Na ia tuuina atu le asini mo Iesu i le Aso Sa na taunuu ai Iesu i Ierusalem.

“Lua te o atu i le aai ua lumana'i oulua, ona iloa atu loa lea e oulua o le asini ua nonoa, o lana tama foi ua faatasi ma ia; lua te tatalaina, i le ta'ita'i mai ai ia te au. Afai foi e fai ane se tasi se upu ia te oulua, ia oulua fai atu, E manao iai le Alii; ona tuu loa mai ai lea e ia.”

A tatou oo atu i le manuia i le lagi, ou te fia feiloai i le tamaloa lea. E tele a'u fesili e fia fai iai. Na faapefea ona e iloa o Iesu lea e mana'o i le asini? E iai se faailoga na e vaai iai? Poo se fe'au faauaealesi? Pe na faali atu se agelu ia te oe? Na faigata ia oe ona e tuuina atu le asini? Na faigata ia te oe ona e avatu lenei manu ia Iesu na te faaaogaina? Ou te fia fesili iai aua e iai taimi e faigata ai ona ou tuuina atu a'u mea totino i isi tagata. Ou te le iloa foi taimi e mana'o ai le Atua i ni mea oi a te a'u. O le a se lagona o le tamaloa ina ua vaai atu ua ti'eti'e Iesu i luga o lana asini? Na e ofo ma e mitamita? Na e 'i'ite o lou loto malie e tuuina atu lau asini, o le a aveai ai ma manu e faaaogaina mo se mea matua taua lava? Na e malamalama o le a afio ma ti'eti'e le Atua i luga o lau asini? Na e 'i'ite o le a faamatalaina e

Evagelia uma e fa lea mea uigaese? A o o'u tau mafaufau i tali i au fesili, ae ou mafaufau ifo foi au, i le tele o a'u foi fesili. E iai taimi ou te manatu ai o loo iai ni mea e finagalo le Atua ou te tuuina atu pe ou te faia mo ia, ae ou te le faia ona ou te le mautinoa lelei poo lona finagalo moni lea pe leai. O isi foi taimi ou te faalotolotolua, ma ou le mautinoa lelei poo lona finagalo moni lea pe leai; o isi foi taimi ou te le faia ona ou te le manatu mamafa iai, ma ou nisi ai le avanoa; ma faamanuiaga.

E le taumate e tele foi ni au fesili e fia fai. O mea faapea, e tofu ai lava tatou ma asini o tanoanoa i o tatou tafatafa fale, a tatou tuuina atu, e faaaogaina e le Atua mo le faalauteleina o le galuega tele o le faaolataga ia Keriso.

E le taumate o lau asini, o lou fesoasoani lea i le tagata o loo mafatia, puapuagatia, faanoanoa,

fia'ai, sauaina. Peitai, poo le a lava le ituaiga asini o loo ia te oe, tuu atu e faaaogaina e le Alii. Tuu atu e na te faaaogaina lou leomalie i pese ma ta le kitara; lou lelei i le kamuta ma fau fale; lou lelei i fagota pe fai faato'aga; faiaoga; loia; moavao; palama; faieletise; valifale; galuega faaofisa; poo le a lava, o lau asini lena e tatau ona e tasi lelei ma tuuina atu mo le Alii na te faaaogaina.

E iai se taule'ale'a talavou, na nofonofo ma mafaufau pe o le a sana meaalofa e tuuina atu mo Iesu ona o lona alofa ia te ia. Na mafaufau i se mea e sili ona ia fiafia iai; ma lelei ai; ma taua ia te ia. Ae ia manatua, o le mea e sili ona ia lelei ai, ma o lana taleni foi lea, ma o loo tele ana tupe e maua ai, o le tatafiti - acrobatic. Ona amata loa lea ona alu i le falesa i le ta o le 12, ua ifo i le faatagata o Iesu, ona tatafiti ai lea.

Na iloa atu o ia e tagata o loo o atu e tatalo ma mafaufau i le Alii i totonu o le malumalu, ona o atu lea ua fesili i le taule'ale'a, pe na te le iloa o le falesa le mea lea a o lea e alu atu i le tatafiti ai a o loo tatalo ai tagata ma mafaufau i le Alii. Ae tali le taule'ale'a, o lea foi ou te tapua'i i le Alii i le mea e sili ona taua o loo ia te a'u, o la'u taleni lea o le tatafiti.

Afai foi e iai sona aoga mo outou ma faafiafiaina ai foi outou a o fai

Tago i Lau 'Ato Tupe

Tago i lau 'Ato Tupe. To a'e ni tupe e te mafai ona e faasaoina; pe te le fia faaaogaina. Tago la'ia e tuu i totonu o se teutusi; faamau le teutusi; tuu lea o le teutusi i totonu o le pusa o lau taavale e tuu ai ou totini lima ma isi au pepa (glove box). Pe tuu foi i totonu o lau 'ato tupe.

Ona e fesili lea i le Atua e faasino atu ia te oe se tagata e sili ona ia mana'omia le tupe lea i lo oe. Ona e faatalitali lea i aso e sosoo ai.

E ono faasino atu e le Atua se tina matua o tau faitau ana tupe ae le lava e totogi ai lana faatau i le

faleoloa; poo se tagata mativa pe ma'i fo'i o nofonofo i le poletito ma 'aisi. E faasino atu loa e le Atua ona e tago lea tuu le teutusi o iai le tupe, i le lima o le tagata; ma e fai iai o le meaalofa mai le na faia o ia, e alofa foi ia te ia. Aua e te faatalitali i se mea poo se tali mai le tagata. E oo i se faafetai. 'Ata'ata iai i le tagata, ona e alu ai lea o oe. Aua e te ta'ua i se isi le mea lelei ua e faia. Tuu pea le mea lilo lea i le va o oe ma le Atua.

E manaia pe a e amio a'i faapea ma e agalelei i tagata matitiva ma puapuagatia.

A Page for Youth

ITULAU MO TUPULAGA TALAVOU

O le Tamaloa ma lana Asini

faaaauu mai le itulau e 8
a outou tapuaiga tatalo i le Alii, ia,
ia viia le Alii e ona mea uma tatou
te maua.

Ua liliu tagata ma o atu ua tootuli
ma fai a latou tatalo, ae liliu ane le
tama tatafiti, ua faaaauu lana
faafetai i le Atua. Ua ta ana fiti.

O le tamaloa lea na tuuina atu
lana asini e faaaogaina e le Alii, na
o se tasi o le toatele o tagata na
tuuina atu a latou asini e faaaogaina
e le Alii i ia tausaga e tele mai
anamua: E le taumate lava e iai se
nofoaga faapitoa i le lagi mo tagata
lautele e toatele na tuuina atu a
latou asini mo le Alii - e pei o Raava
ma lana maea na nonoa i le
faamalama; o le pakete a Paulo; o
le maata a Tavita; o le ivi'auvae a
Samasoni; o le u'u manogi na u'uina
ai 'a'ao o le Alii; o le tootoo o Mose;
o Maria na nofo i tafatafa o Iesu;
na na iloa le tele ma le taua o le
mea ua ia faia mo le Alii, ae sili ai
ona anoanoa'i le mea na faia e le
Alii mo ia ma le mano mano o
tagata o le lalolagi. Faapea le soo
e le o ta'ua sona igoa, na ia saunia
le moega e tofa ai le Alii i le vaa.
Ma le maumausolo i tafaala o le
ala o Via Tolorosa.

E le taumate o loo finagalo le Alii
e afio i lau asini ma ia ulu atu i
totonu o pa o se isi aai, se isi malo,
se isi loto. E te tuua o ia e ulufale
atu? Pe te faaletonu?

Manatua Raava na na faalafi le
sipai. Tagata na latou faasaoina
Paulo. Tavita ma le maata ma
Koliata taufaifai. Le 'au tasi -
Maria i 'a'ao o Iesu. Ma le
maumausolo i le Via Tolorosa.

O le isi lenei: o le faiaoga A'oga
Aso Sa i le senituri e sefuluiva, na
ia ta'ita'iina le faatau seevae ia
Keriso.. O le igoa o le faiaoga

Aso Sa e te le'i faalogo lava iai - o
Kimipala. O le igoa o le faatau

Saili mai se mea lelei i totonu o le Gasu

(Salamo 80:1-7)

Sa galulue atalii e to'a sefulu o
Iakopo i le fanua i le leoleoina o a
latou mamoe, ae latou iloa atu lo
latou uso laitiiti o Iosefa o savali
mai i le mea o latou iai. Fai mai le
'auuso, "Poo fea a alu iai le fai
miti.?" O Iosefa o le atalii lea e
aupito sili ona alofa iai lo latou tama.
O le tama foi lea, e ese le fai soo o
ana miti, e uiga i lona pulea o lona
aiga i se aso.

O le mea na sosoo ai, ua pu'e e
le auuso Iosefa ma lafo i le lua.
Peitai ua latou le fasiotia o ia, a ua
latou filifili e faatauina atu o ia i
tagata faatau'oa o malaga ane. O
le aso lea na amata ai le tele o mea
na tutupu ia Iosefa, amata mai i le
faatauina atu e fai ma pologa, oo
ina tautua i le maota o Farao,
tuu'a'iina fua ae le agasala,
falepuipui, sosoo ma le tulaga pule
i le falepuipui, seia oo ina feiloa'i
ma le tupu ma tofia ai o ia e pule
lua ae pule sili Farao. O le oge
tele i Aikupito na oo ina feiloa'i ai
Iosefa ma ona uso ma lo latou tama
o Iakopo. O mea uma na tutupu i
ia tausaga, e le'i maluelue ai lava
le faatuatua o Iosefa i le Atua, ma
lona talitonuga, o loo leoleoina o ia
e lona Atua. "A o outou, na fai
togafiti e outou ia leaga ai a'u, a o
le Atua, na finagalo o ia ia i'u i le

seevae na ia faaolaina o Tuaiti Muti
(Dwight Moody).

Na oo ina aveva Muti ma fai
evagelia logologoa na fai ma
faamalosi'au i le failauga talavou
o Frederick Meyer, na ia maua
Chapman, o le na ia faaolaina Billy
Sunday, o le na ia faaolaina
Mordecai Hamm, o le na ia
faaolaina Billy Graham.

O le au fai asini uma o le Tala
Lelei. Vaai ane loa poo a ni au asini
o iai, ta'ita'i mai ma ave uma mo
le Alii na te faaaogaina.

lelei, ina ia oo ina faaolaina o le nuu
e toatele, pei ona taunuu ai i ona
po nei. O lenei, aua ne'i matata'u
outou, o a'u nei ou te tausi lava ia
te outou ma a outou fanau. Ona
faamatala loto mai lea o ia ia te i
latou, ma tautala lelei mai ia te i
latou." Kenese 50:20-21.

E peiseai o le Salamo 80 o loo
faaali mai ai lagona o Iosefa. O le
mea moni, i le gagana Eperu, o le
upu o loo faaaogaina mo Isaraelu i
le fuiuipu 1, o le igoa Iosefa. Ma e
le taumate na fai soo e Iosefa lenei
tatalo a o iai o ia i le lua ma le
falepuipui.

Pei lava la ona liliu soo Iosefa
ma le fai Salamo i le Atua ma
faatuatua ia te ia na te liliu le mea
leaga e fai ma mea lelei, ia faapena
foi ona tatou liliu pea lava pea i le
Atua, ma tatou faatuatua ia te ia, i
o tatou taimi faigata e tele tatou te
fevesia'i ai ma popole.

My Greatest Joy

*"I have no greater joy
than to hear that my
children are walking in
the truth."*

(3 John 1:4)

Kerisiano Sauaina i le Lalolagi O le Malosi le Matineia o le Alofa - (Ehsan - Iraq)

mai le itulau e 3

o ia faia, na tau faaletonu Esani ae na oo ina ia taliaina le valaau. Ina ua uma le galuega e iva itula o fai e leai se malolo ma se meaai, ona fai lea o Asara ia Esani la te o la te aai. O ina na fesili ai Esani ia Asara, “O le a le ituaiga alofa lea e tautala soo ai? O le a le mafuaaga o lou alofa?”

Na te'i Asara i le fesili, ona nofonofo lea mo sina taimi ae le tali. Toe fesili Esani, “Aisea e te tuu ai Tusi Paia i totonu o taga meaai? Aisea foi e te alofa ai i tagata e te matua leiloa lava ma e te le masani ai foi?” “Ae tali Asara: “O le aso leni ua e vaai ai iai o loo iai le Atua o loo i tua atu o matou, o ia faamalasia matou matou te galulue. O ia lena o loo aumai ai le alofa lea matou te alolofa ai.”

E tele isi fesili na fai a Esani, ona ia talosaga ai lea pe mafai ona maua sa na Tusi Paia. Na talia e Asara ma fai atu iai, “Amata mai lau faitau i le Mataio. ‘A ‘e le malamalama i se mea ona e tatalo lea ma e fesili ia Iesu e faamalalama mai ia te oe. Vili mai i le taeao ma ta'u mai sou manatu i mea na e faitauina.”

Ua fiu Asara e faatali e le'i vili mai. Ona vili lea iai ia Esani, ae tali mai, “Si a'u uo, na ou ala i le po atoa, ona ua faaali mai Iesu ia te au. Ua ou mana'o e papatisoina au. Ua ou fia auai i le galuega lea o loo e faia.”

Na tali iai Asara, “O le misiona mo Iesu, e le faa'afa'afa, e tuu atoa iai lou ola. Ona o le ola o le Kerisiano, o le ola ositaulaga; tautua; auauna.”

Ona amata lea ona auai Esani i sauniga lotu i Epili, ma papatisoina ai o ia. Ua fesoasoani i le faiga o taga meaai mo tagata sulufa'i, ma

tatalo faatasi ma isi faigaluega Kerisiano. Na fesili se uo a Asara ia Asara pe o le a le mea ua tupu ia Esani ua matua sui lava ona uiga. Ae tali Asara, “Ua ia maua Iesu, ma ua ia maua ai le to'afilemu ma le mapusaga.”

O le mea moni lava e le o le fia malamalama o tagata i mataupu faalelotu, a o le fia iloa le mafuaaga

o le alofa o faia i le ola o tagata Kerisiano i mea o nonofo ai. O fea e pupuna mai ai? A ola ai Kerisiano i le alofa o loo finagalo iai Iesu, ola ai ae le na o le tautala iai, e matauina e tagata ma manana'o iai mo latou foi. Fetalai Iesu: “O le mea lea e iloa ai e le lalolagi o o'u soo outou, pe a outou fealofani.” - Ioane 13:35. Manatua, e le na o le iloa o Iesu, ae le faaaogaina; a o le iloa o Iesu, ma ola ai i mea o ia a'oa'oina mai e tataua ona tatou fai, tatou te manuia ai. E matua le aoga lava lou na ona e iloa o Iesu ma ana a'oa'oga, ae te le faaaogaina.

Ou te mana'o i le tama'i maile lale!

Na 'ou faalogo i se fama sa iai ni ana tama'i maile e fia faatau atu. Na ia tusi se faasalalauga e uiga i tama'i maile ia e fia faatau atu, ona alu lea ua tutu'i i le pou o le pa o lona fanua e lata i le aualea e faigofie ai ona iloa e tagata. A o tu'itu'i lana faaaliga i le pou, na ia faalogo atu ai ua toso lona 'ofu e se isi. Na vaai ifo ma na iloa ai se tamaitiiti ma lana 'ata tele tele lava ua 'afagafaga ai ona laugutu, o loo 'u'u se mea i lona lima.

“Faamolemole fama, ou te fia faatauina se isi o au tama'i maile,” o le tala lea a le tamaitiiti ma 'ata'ata.

“Ia vaai oe,” ua amata tali le fama, “o tama'i maile ia e fananau mai i ni maile matua lelei lava. O le mea lena e taugata ai.”

Ua faanoanoa le tamaitiiti ma punou i lalo, ona toe ea a'e ai lea i luga ma fai atu, “Ia, o lea e iai la'u 39 sene. Mata e lava lena tupe e na ona ou matamata ai i au maile.”

“Ioe! o le tali lea a le fama ma tatagi loa lana faaili, ma tauvalavala'au maile. “Si'usi'u, sau. Si'usi'u!” E le'i umi se taimi ae tamo'emo'e mai Si'usi'u ae taumulimuli mai ai tama'i ta'ifau

fulufulu ma foliga mai o ni polo fulufulu mafiafia. Ua fetepatepaa'i solo mata o le tamaitiiti i le fiafia. E le'i umi se taimi ae tamo'emo'e mai le isi tama'i ta'ifau, e tamo'e ma sulu, tamo'e ma sulu pe taavalevale a o taumafai e tuli mai isi tama'i maile ia na muamua mai. E le taumate o le ui'i lea, pei fo'i e iai se mea e faaletonu o lona tino. Na vaavaai lelei atu le tamaitiiti i le tama'i maile lea mulimuli, ma fai atu i le fama, “Ou te mana'o i lea.”

Fai mai le fama, “Talofa e, vaai oe, e le aoga le tama'i maile lea mo oe, e le mafai ona tamo'e ma lua ta'a'alo e pei o le mea lena e te mana'o iai.”

O le taimi lea na tago ifo ai le tamaitiiti ua toso a'e i luga le vae o lona 'ofuvae ma faaali mai lona vae e pi'o ma o loo faamaumau i u'amea e tau i lalo i se seevae fau faapitoa. Na toe vaai atu i le fama ma fai atu: “Ia vaai oe, e le mafai foi ona ou tamo'e lelei ona e leaga lo'u vae. Ma e mana'omia e le tama'i maile lea se isi e pei o a'u e malamalama i ona foi faafitauli.”

tusia e Charles Stanley,
faamatala e Afemata Apelu Aiavao.

O le Mafuaaga o le Pese:
In Times Like These
(1943)

O le pese lenei na faalototeleina a'u talu mai lava lo'u laitiiti, ma e ou te le'i fiu e faalogologo iai pe ou te usuusua foi e a'u lava ia. O Ruth Caye Jones, na fanau i Wilmerding i Pennsylvania i le tausaga e 1902, ma o ia lea na ia tusia upu ma le fati o le pese. A o talavou lava na nofo ai ma ia a'oa'oa ia i le taina o le piano ma le okeni. Na faaiipoipo i se faifeau ma maua ai se la fanau e to'alima. O le tausaga e 1948 na ia amataina ai se polokalame i le leitio, ma faasalalauina mai lo la fale i Erie, Pennsylvania. A o le vai taimi lea, ua matua lauiloa lava le pese lenei:

In Times Like These.

Na ta'ua e William J. Reynold i lana tusipese se tusi mai le tama tama a Ruth, o Bert L. Jones e uiga i le tusia o upu ma le fati o le pese.

Na tusia e Mum le pese lenei i aso pogisa o le Taua Tele Lonalua a le Lalolagi ma mafaufau i upu o tusia i le 2 Timoteo3:1: "Ae ia e iloa e oe lenei mea, o ona aso e gata ai e oo mai ai aso faigata." O le pese na tusia i lo matou fale, ma o upu ma le fati e pei o ni mea e tafe mai i se puna, a o vevesi i ana fe'au i lo matou aiga - o fai lana auli i le taimi lea. Na ia se'i a'e

le fasi pepa mai le taga o lona ofu ma amata tusi ai upu ma le fati o le pese. Ina ua ou foi mai le a'oga maualuga i le aso lea, fai mai Mum, 'Bert, sau e faaa'oa'oa le pese fou lea na aumai e le Alii ia te a'u i le aso.' A o ou tataina le pese mo le taimi muamua, e le'i iai se manatu o le a avea ma se ala o faamanuiaga e tele mo tagata e toatele. Ua faaaogaina soo i polokalame faalelotu a Billy Graham. A o se taimi matua taua tele ia Mum, ina ua valaauina o ia e le tagata pese lauiloa o George Beverly Shea, e alu atu e nofo i luma o le faapotopotoga, a o ia usuina le pese lenei.

Na maliu Ruth Caye Jones i Erie ia Aokuso 18, 1972, a o loo mulimuli atu pea ia te ia le galuega tele na ia fai. Ma ua atili taua ai ona tatou mautinoa o tatou taula o loo tau uma i le Papa Autu.

In Times Like These (1943)

In times like these you need a Savior, In times like these, you need an anchor. Be very sure, be very sure, Your anchor holds, and grips the Solid Rock. This Rock is Jeus, Yes, He's the One, This Rock is Jesus, the only One! Be very sure, be very sure, Your anchor holds and grips the Solid Rock.

In times like these, you need the Bible, In times like these O be not idle; Be very sure, be very sure, Your anchor holds and grips the Solid Rock. This Rock is Jesus, yes He's the One; This Rock is Jesus the only One, I'm very sure, I'm very sure, our anchor holds and grips the Solid Rock.

In times like these, I have a Saviour, In times like these I have an anchor. I'm very sure, I'm very sure, My anchor holds, and grips the Solid Rock. This Rock is Jesus, Yes He's the One; This Rock is Jesus, The only One! I'm very sure, I'm very sure, My anchor holds, and grips the Solid Rock.

E iai isi Avanoa

O Jonas Salk, le saienitisi ta'uta'ua na ia mauaina le togafiti (vaccine) mo le ma'i o le polio, e malamalama lelei i le uiga o le upu faalototeleina. Na fesiligia o ia, "Na faapefea ona avea lenei matati'a na e ausia, lea na tafi'esea le polio mai le lalolagi, ma a'oa'oga mo oe pe a e mafaufau i isi au taumafaiga e 200 muamua e le'i manuia?"

"Leai, na manuia uma lava. Aua na fesoasoani mai mea na sese i taumafaiga e 200 muamua, ma maua ai le mea sa'o i le taumafaiga e 201. E leai se taumafaiga e le'i aoga.

O le palemia ta'uta'ua o Peretania o Winston Churchill na fesiligia, o le a se mea na fai ma a'oa'oga taua mo oe na ala ai ona manuia au taumafaiga mo Peretania i aso o le Taua Tele a le Lalolagi?" "O lo'u le pasi i le su'ega ona ou toe nofo ai lea i le vasega sa ou iai." O lona uiga na e le pasi? Leai, e le o lena. Ae ua toe maua lo'u avanoa ou te toe a'oga ai i mea ou te le'i lelei ai."

Mafaufauga i le Aso o Tamā

mai le itulau muamua

O le Aso o Tama - *Fathers' Day*. O le aso e faailogaina mo Tama ma lo latou aoga i le 'aiga ma o latou ta'ito'alua ma fanau. Faapea lo latou aoga i pulega faale-nuu, faale-aiga; faa-matai; faataulele'a; ma faale-lotu. O le aso fo'i e faamanatuina ai lo latou alolofa i o latou ta'ito'alua, ma a latou fanau.

O le aso e faafetai ai ia i latou ma a latou mea e fai mo le tausiga o le aiga: o se galuega e totogi e maua ai tupe; o le faiga o le ma'umaga; o toga-taamu ma toga-fa'i; a le o lena, o le fagota i le aloalo poo tua'au poo le 'afa'afa loloa i le vasa tele; ta'ifee; tatao fagapusi; pa-i'a poo le matau malie poo le aloalo atule pe fana-tu'u, lafo le tili Saina pe toso faalau o se upega ma tatao i le aloalo pe mata laumei foi.

O ia faiva uma sa fai e lo'u tama ma isi tagata o lo matou nuu i Leusoalii a o matou nonofo ai, i le aloalo ma tua'au o le nuu, ma oo mai lava fagotaga i a'au o Vailele, Moataa, Vaiala ma Apia. Sa aai ai lo matou 'aiga. A tele se faiva ua tufa - ave i'a ma le faifeau, ae tufa i tua'oi nisi. A fu'e se umu i'a, ona sauni lea o lo'u tama e savali i Apia e momoli ni afi ma o matou aiga i Apia, ma moe ai faato'a toe usu atu i le taeao o le isi aso. E savali lava e le alu i le pasi e tasi sa iai i na aso, le pasi a Polo (Gold Star). A o le alatele mai Leusoalii i Apia e le faataina. O isi aso ta te fesili atu ai i lo ta tama pe o fea a alu iai ae fai mai e alu i Apia e faatau mai se suka. Ae savali! I maila e ono toe sau ai pei o se mea faatauva ma latalata.

A ou mafaufau atu nei iai, e ese le faigofie i lo'u tama le amoamo mai o lona gapia mai Leusoalii i Apia i maila e ono pe a. E fai ona seevae pa'u taavale sa taatele i na aso e le'i iai ni seevae tosotoso. O seevae e nofo lava le tagata ia

ma fai. Ae a foi atu i lo matou aiga i le aso fou, e alu atu ma se suka ma se falaoa se tasi pe lua, o se apa eleni pe samani se tasi, se masina ma ni aniani e fai ai lu'au. E matou te fiafia lava e 'ai falaoa e le faapataina, ae loloi i le koko Samoa. Pe tatala foi le eleni ma tufatufa ia lava ai matou tamaiti ma o matou matua, i le apa eleni e tasi. E fa'a'amu'ia isi aiga ia outou pe afai o 'ai sau tou apa eleni poo se samani.

O moliga mea'ai na, na ma o ai ma lo'u tama i se isi aso, na faato'a ou vaai ai i le faleloa o BP (Burns Philip) lea i tafatafa o le uati i Apia, lea na faatau e Amau i tausaga mulimuli ane. Faato'a ou vaai lava lea i ni moli eletise, o moli o le fale lea. Ua malama atoa ai le fale ma ona poletito. E le o ni moli karasini poo ni moli matagi, a o moli uila e matua malolosi lo latou malamalama. O le mea lena na sili ona ou matauina i le taulaga i Apia, o ona moli eletise e malamalama atoa ai le fale. Ma e na o le taulaga lava i Apia sa mu moli eletise, sa ta'i mai le afi sa i totonu o le lotoa o le Ofisa o Galuega i Savalalo.

O nisi aso e alu ai se ma fanafanaga ma lo'u tama i auvae mauga, o vanu ma alia i tuamaota o lo matou nuu. I na aso, o le tele ia o le lupe. O le mea ou te ofo ai, o le lelei ia o le vaai a lo'u tama. E faasino mai se lupe o tu i luga o se laau, ae ou te fiu a'u i vaai ou te le iloa atu. Se'iloga ua puna atu i se isi lala ona ou iloa lea.

E fana e lo'u tama lupe, ae tuli a'u e aumai. E lelei pe a ua pe; ae afai e manu'a mitimiti, ia e fai a lua tuliga ma le lupe. E ma'osi'osia ou lima i le taufela'u o lupe ma tafiti i le fia sosola.

A a'e mai faiva ma tatoso mai paopao i le matafaga, ona tauvalaau mai lea o lo matou tama e alu atu se isi ma se ola e aumai ai i'a. A mana'omia se ola o lona

uiga ua tele i'a o le faiva ua le ofi i le lau o le foe.

O le isi mea e matua le galo ia te au mai lo'u laitiiti, o le lotu afiafi, i le taimi o faiga lotu a le nuu. E fai lava le lotu afiafi i aso uma. E fai e lo matou tama le lotu, ae usu e lo matou tina le pese ae matou te mulimuli atu ai. E faitau ma le Tusi Paia e lo matou tama. Ae ou te manatua, e fai mai loa "Tatou ifo ma tatalo," o le taimi lena e faapupuu ai le tamaitiiti ia, ma moe lelei lava. Faato'a ou te'i lava ina ua sii a'u e lo'u tina i se mea ou te moe ai. Ma 'ote: 'Sole, ua a la lou taa lena ma lou moe pe a fai le lotu.'

Pei o le taimi lea e sili ona ou alofa ai i o'u matua, aemaise lava lo'u tina, pe a sii a'u, ma fuefue le ta'inamu, ma ma ulu faatasi i totonu o le ta'inamu, ma faata'oto au i lo'u moega. Pei ou te fiafia i le momoe faatasi o lo matou aiga, ma faalogologo faatasi i fagogo pe a fai, ma le fai mai a lo matou tina, 'Fai ma 'aue mai e iloa ai o tou feala.' Ou te manatua, o lo matou tina lava e faia fagogo. A o lo matou tama e vave tele ona moe, pe fai mai foi e alu atu se isi e tu'i lona ulu. O nei aso, ua tatou le toe fai fagogo, ua tele fo'i ina leai ni lotu afiafi, ona ua tatou faalogologo i leitio ma matamata i televise.

O le lotu i le vaveao ta te faalogo a'e ua pepese, ona e nofo a'e lea i luga ma e tulemoa ma pese. Ma matou iloa ai, ua na o tina lea e pese mai, a ua leai tama ua ala usu e toso lana pa i le tai fana'e o le aso fou, pe ta'ifee fo'i i le aloalo. O pese sa masani ona usu i lotu a le aiga i le taeao ma le afiafi o le "Ua usu mai au mea lelei", "Le Tama e ua ou maua ai, o le aso fou lena": "O a'u na ou taoto", ma isi.

Ina ua matou sii i le isi o matou nuu, o Sataoa, na ou amata taumulimuli ai i sopo a nisi o taulele'a e o mai i Apia e faigaluega i le Vaa Fa'i, ma fo'i atu ma 'apa eleni, apa samani ma le papa faalaoa e tasi pe lua, i na aso e na o le seleni pe sefulu sene le tau o le papa falaoa E amata mai le ala

faaauau itulau e sosoo ai

Mafaufauga i le Aso o Tama

mai le itulau e 12

sopo i ga'uta o Lotofaga Safata, ui mai i le Fasafasa, Vanutele ma le vaituloto o Lanotoo ma taunuu mai i Tua'efu i le mea o iai le maota o Ta'isi. O le alasopo lea na ou inu ai i le Fue Inu, o le fue lea a sala mai se lua pe tolu futu, ona faatu lea i luga ae tafe mai ai le vai ma e inu ai. E magalo lelei lava pei o le vaiauli. Ou te manatua a sopo mai lo matou tama e galue i le Vaa Fa'i, e tagi lo matou tina, ona matou fetagisi atu ai foi lea o matou le fanau. Aua e tusa o le lua i le tolu aso e o mai ai i galuega o le vaafa'i. O vaa sa ave ai pusafa'i i na aso o le "Matua", le "Tofua" ma le "Maui Pomare." E ta'i lua vaiaso ma sau le vaa mai Niu Sila e avatu pusafa'i.

I aso o le Taua Tele Lonalua a le Lalolagi - 1939-1945, sa matou nonofo ai i Aleisa i le faatoaga e 50 eka a le tuafafine o lo matou tama ma lona toalua. Sa fai ai o

matou ma'umaga tetele ma la'u le matou talo e faatau i Tutuila. O le faatoaga lea na ou iloa ai le matua galulue o o'u matua. E vave usu lava i le ma'umaga i le taeao. E fo'i mai i le fale pe ua ta le itula e iva, ua susu uma o la lavalava i le sau e to'a i lautalo. Ona o ane lea ua fai sa matou faalifu ma tunu ni afato mo le matou mea'ai o le taeao. I na aso o le mea fua ia te a'u le 'ai mata o le afato. A o nei aso, ua le mafai ona ou 'ai mataina se afato.

E o atu tagata faatau popo mai Faleata ia latou solofanua ma taga popo, tuu ma matou popo pe 50 ae ave a latou taga fa'i poo ni taga talo i avega a latou solofanua.

O nei aso ua ta matua, ma ua leai ni matua ua maliliu, a ua tele tupe e maua. O le mea fua lota ave o se \$100 i se isi. Na o lota moomoo, se'i toe ola mai tama ma tina, ae se'i o ta tuuina atu iai ni tupe faapea ona tele ua maua i nei aso.

Ou te le'i vaai lava o fasi e lo'u

tama lo matou tina. Ae a sasa se isi o matou ae oso atu lo matou tina e laveai, ona sasa faatasi ai lea ma lo matou tina. Ou te manatua e tagi foi lo matou tina pe a lavea atu ai foi ma ia i le sasa, ma fai ia tama, 'Matua e le alofa i si a'u fanau.'

E tele lava mea tatou te mafaufau e fai mo tama ma tina, ae ua leai, ua maliliu. A maliliu ua tatou fetagisi: "Tama, tina, ua e sola ae le'i lava la ta tausi ia oel!"

Soo se taimi e alu ai lo matou tama i Apia, e le mafai ona le fo'i mai ma ni panikeke ma lo matou tina, e faatau mai le fale'aiga o Ah Fook, poo Ah Leong sa i Savalalo. Pei o sona oso faapitoa mo lona toalua. A sau fo'i, ona nonofo fesaga'i lea, ma 'ai to'alua a la panikeke, ma talatalanoa. A ou mafaufau atu nei iai, e pei lava lo matou tina o se manulele o faatalitali atu i se ofaga, mo le fo'i atu o lo matou tama ma le mea'ai ma ia. Ona la faafesaga'i fiafia ai lea ma 'ai a la panikeke na o la'ua.

O le taimi o le maliu o tama, poo *faaauau itulau e 16*

Ua Otaotā le Lalolagi ma le Vateatea 'ona o Tagata

O le faafitauli ogaoga ua faafeagai nei ma tagata o le lalolagi, poo fea a tia'i iai le anoano o le otaota o tupu mai le tele o mea o tatou faia e pei o mea'ai, oloa gaosi, masini, galuega o faia i le vateatea ma tatia'i ai otaota ma taamilomilo ai lava i le taavili a le lalolagi (earth) ma ona kalave, e pei ona tatou vaavaai atu iai i ata o televise. O otaota e tatia'i i vaitafe e taunuu uma lava i le sami pe a le aveesea ma le vaitafe. Ua faaopoopo atu i isi otaota o tatia'i i le sami e pei o pepa 'i'ila (plastic) e pei ona faaali mai i televise.

O taaviliga o matagi ma le fetafea'i o le au ua i'u ai ina faaputuputuina i nisi ogasami o

vasa tetele, pei o le Vasa Pasefika, nei lapisi e le pala, a pala fo'i, e oo atu i le selau tausaga poo le matua sili atu foi faato'a pala, e pei o pepa 'i'ila. Ua 'ai e nisi o meaola o le sami e pei o laumei nei lapisi e le pala, pei o pepa 'i'ila, pe lavelavea ai foi, ma oo ina mamate ai.

O le faatupututeleina o le aofa'i o tagata o le lalolagi, o le faatuputeleina foi lea o lapisi lafoa'i i vaitafe, vaituloto, le lau'ele'ele ma le sami, ma le vanimonimo.

Onosefulu tausaga taluai, sa to'aitiiti lava tagata sa nonofo i Apia ma ona talafatai. Sa laitiiti ai foi lapisi ma sa le mana'omia ai ni taavale tetele e ao ai le lapisi e pei ona fai i nei aso.

Onosefulu tausaga talu ai, e faatasi ona taamilo atu le taavale ao lapisi i Apia nei, mai Matautu i Mulinuu. Ma e na o le taavale solofanua e tasi sa sasasasa atu e aoina le lapisi.. E leai ni taavale se tele sa tumu ai Apia ma faalavelave i le aoga lapisi a le taavale solofanua. Ona avatu lea o le lapisi ua tia'i i Mulinuu i le fanua i le itu i sasae o le fale o le HRPP ma le fanua ua iai nei tane suauu. O le tele foi o aiga sa tanu pe susunu a latou lapisi. A o nei aso, ua iai ma lapisi e pei o pa'u taavale e fia ni miliona le tele e le pala e le tatau foi ona susunuina aua e leaga ai le siosiomaga. Ua faulala'i foi masini ua leaga e pei o komipiuta, leitio, pusa'aisa ma televise, ma atigi taavale e fia miliona i le lalolagi atoa. O le tele o le 'oa, o le tele foi lea o le otaota. E moni lava, ua otaota le lalolagi ma le vateatea ona o tagata.

O E UA FAI'ILAGI LE FOLAUGA

KATELINA SCHWENKE FIU

Tiakono Tama'ita'i

Na soifua mai Katelina i le aso 7 Mati, 1941, ae valaau o ia e lona Matai, 16 Aperila 2018. O matua o Katelina o George Schwenke ma Emeliana Roache Schwenke. Na faaipoipo atu Katelina ia Fagaese Fiu. E toa ono le la fanau ma le la tama fai e to'atasi. O le aofai o fanau a le fanau e toa 27, a o fanau a le fanau e 10. Lona uiga e toa 43 le aofai o i latou na soifua mai ia Katelina ma Fagaese.

Na umi se taimi na'o Katelina ma si ana fanau ina ua maluu Fagaese, ma o ia lava sa tausia ma vaaia si ana fanau sei oo ina iu a'oga ma tofu galuega uma.

Na faaetia le tofi tiakono o Katalina i le aso 5 o Mati 1993.

Na galue mai ai lava lea i lona taimi sei oo mai i le amataga o le 2017 ua le atoatoa lona malosi e tautua ai ae le misi se Aso Sa i le lotu. Sa usufono Katelina i le fonotele i Malua i le 2005.

E ese le pele ia Katelina o lona tofi tiakono. O se tinā e saunia lelei, soo se taimi e tofia ai e tatalo i se sauniga a Tinā, po'o le pulega po'o totonu lava o le matou aulotu, e talosaga mai lava Katelina ia vave ona ta'u atu ia te ia pe toe lua vaiaso ona faia lea. E faapenā foi pe a tofi e lauga, poo le Aso o Tinā, poo isi sauniga o le tausaga, e mana'o lava e vave logo atu ia, ae sei tapena iai, E fai mea fiafia, saunia lelei, toe fai mea lelei.

O se tasi o tinā o lenei aulotu e faapolopolo ana mea e maua mo mea e fai a le aulotu. E le lagona sona leo i tonu fai a le aulotu, a o le leo tele ia o ana galuega faatino. E tolu upu ou te ta-aofa'i ai se faamatalaga i uiga o lenei tinā. Muamua, e fai mea fiafia. E faafeiloai lava soo se tagata i le 'ata. E faigata ona iloa atu pe ita poo musu, auā na o le 'ata lava.

Lona lua, o se tinā, e saunia lelei. Amata mai lava i le mea e alala ai. O le faatinoga foi o ona tiute, e lelei tapena ma saunia lelei. Lona tolu, o se tinā e loto alofa. E alofa i lana fanau ma a latou fanau. E matala foi faitotoa o le fale o Katelina mo soo se tasi ua leai se mea e nofo ai; tusa lava pe leai se sootaga, ae alofa moni lava iai Katelina. E alofa i le matou aulotu ma lona ausaga. Pe alu malaga Katelina, e poloai lava i si ana fanau, e aua nei galo ana lafoga ma ana mea faa-lelotu. Pe fia vaiaso e le oo atu ai se asiasiga a le faifeau, e alu atu lava o loo faatalitali mai lava le faapolopolo a le o se tupe, o se oloa taua mai fafo.

Ou te faafetai ai i le nofoaalo, le Susuga i le Faafeagaiga ia Esaroma ma le faletua ia Ruta, le Afioga ia Lemamea Limbo ma le faletua o Fonoti, ma le fanau uma lava i Samoa ma atunuu i fafo, e ese le moni o lo outou alofa i lo outou tina. Faafetai.

O toe sauniga o Katelina sa faia i lana ekalesia e pele ia te ia, o

Apia-uta. O le ta'ita'i; o le faifeau Toeaina Siolo Tauati. Na faaulufale le tino maluu – Reupena Nofoaiga FS, o le faitauina o le Tusi Paia o Nouafa Saifoloi A'oa'o Tausinuu. O molimau: Faletua Ruta Fagaese Fatilua, o Joseph Schwenke; o le tuagane o Katelina, ma le molimau a le Faifeau – Siolo Tauati (FT).

O talosaga sa saunia i le Afioga i le Alii Sea, Afa Tyrell, o le Matagaluega Vaivase-uta; ma le lauga na saunia e le Faifeau Toeaina, o Enefatu Lesā. O ona toe sauniga i le tuugamau, na ta'ita'ia e le Faifeau Toeaina Siolo Tauati. Sa faatofa atu ia Katelina i le lagi ina o le pese 268.

Ua fetalai Iesu: E moni ou te fai atu ia te outou, o nuu uma lava i le lalolagi e oo atu iai le talalelei, e taua ai foi lenei mea ua faia e ia, e manatua ai o ia. Manuia lau malaga.

**Saunia: Siolo S. Tauati (FT)
EFKS Apia-uta**

IMOASINA FAATONU

22 Ianuari 1969 - 6 Aokuso 2018

O le faletua o le faifeau nofo aiga o Kereta Faatonu. Sa soifua mai i le aso 22 Ianuari 1969 i Rotorua i Niu Sila. O ona matua o Leleisi'uao Palemene ma 'I'iga Suafale Pisa. Sa faaipoipo atu ia Kereta Faatonu i le aso 14 Iulai 2014. Sa faasuafaina i le suafa Tofilau o Iva, a o le'i faaipoipo atu i le faifeau. E to'atolu ona uso ma tuagane e to'alima. Sa a'oa'oina i le a'oga a le faifeau, le a'oga a St. Mary's i Vaimoso. Sa faigaluega i le Ofisa o le Fono Faitulafono a Samoa mo tausaga e tele, a o le'i faamavae ma malaga i Niu Sila. Sa

faafuase'i ona valaau lona Matai ia te ia, i le aso 6 Aokuso 2018 i le 10.00 i le taeao.

Sa faia lona sauniga faale-aiga i le fale maluu o Pa'u Sefo i Motootua i le aso 13 Aokuso 2018. Sa ta'ita'i ai le Susuga Hemi Faatonu F.S, ma molimau ai aiga, uo ma aumeamamae i uiga tausafia, faamaopopo mea o le tina. O lona toe sauniga sa faia i Tanoalei'a i le 11 Aokuso 2018 i le taeao. Sa auai le Pulega Vaimauga Sisifo. O a'u sa ta'ita'i, Petaia Leavai FS sa molimoli maia le sa o le tina.

O le Tusi Paia sa faitauina e Iese Uele AM. O talosaga sa saunia e Semikueva Faatoafe FS, o Seilala Luamanuvae FS sa saunia le upu faamafanafana. Sa molimau le

faaauau itulau e 15

O E UA FAI'ILAGI LE FOLAUGA

IMOASINA FAATONU

mai le itulalu e 14

faifeau ia Kereta i le la mafutaga, o sui o aiga o lona tama ma lona tina, ona faaii lea i le molimau a le faifeau. Sa molimauina o se tagata

faamaopoopo mea, e amata i lona lava aiga, e oo i sosaiete sa auai e pei o le SMOGA, o teine tuai o le A'oga a St. Mary's. E loto aiga ma osiaiga ma maopoopo aiga i lona auai. O ana meaalofa sa lelei ona faaaogaina e faamamalu ma faamaopoopo ona aiga e pei ona finagalo ai lona Matai.

Ona sosoo ai lea ma le tapuaiga

i lona oliolisaga tumau i lona aiga i Vaiala. Ma pepese ai i le pese faatofa a le 'au uso - Talofa uso e, tofaina oe, ua sau le itupo e malolo.

Tofa Imoasina Kereta Faatonu. Manuia lau malaga.

Enefatu Lesa FT,
(Tanoalei'a)

Faava Feil oivao Vil ia Tuigamal a

Soifua: 6 Novema 1930
Maliu: 13 Oketopa 2018

'Maliu mai ia o oe ua faamanuia e le Alii; se a le mea ua e tu ai i fafo? Aua ua uma ona ou teuteua le fale.....' Kenese 24:31

O le tausaga 1968 na faatiakonoina ai Tuiloma Vilia ma Faava i le EFKS Falelua Vailuutai & Faleatiu. A o le 1972 na maua ai lo la tofi A'oa'o Fesoasoani. Na malaga mai i Niu Sila ma galulue i le PIC, ae sa le uma le naunau e toe foi mai i le EFKS. O loo tusia i api a le Pulega Maugakiekie, sa fa'ae'etia lo la tofi tiakono i le aulotu nei i le masina o Novema 2008 e galulue ai, e ui o loo naunau e faaaoga lo la tofi A'oa'o Fesoasoani. Sa faatuina e Tuiloma ma Faava ma nai o la alo le aulotu PIC na faaigoaina o le Lupe o le Talalelei. Mulimuli ane o le aulotu lea na fanau mai ai le Aulotu lenei ua taua o le EFKS Mangere Bridge ia Mati 2008. Ua tautala ma gagana mai galuega a lenei tina, aua ua tupu ma ola le aulotu. Ua atili tautala mai le faatuatua o lenei

tina aua ua fai ma avefeau a le Atua i le aulotu EFKS i Ranui lana lupe faalele a o le tamafanau foi a lenei aulotu, le susuga i le faafeagaiga ia Filemoni ma le faletua ia Alefa.

E ma te ulufale mai i le aulotu lenei i le ogatotonu o le 2009 o faia pea le matafale a Tuiloma ma Faava. Peitai, o le amataga o le 2010 na tuueseina ai le la matafale, i le manatu o le faifeau sa iai i lea taimi, ua lava o la alo e fai matafale. Na muai feiloai atu ia Tuiloma ma Faava i le faamanatuga o Tesema 2010, o le amataga lea o le matou mafutaga. Sa faapea foi ona toe faaaunau ai ma le la matafale ona e fia galulue pea seia oo i le oti. Na tuumalo lona alii Tuiloma Vilia 26/2/2013, ona finagalo ai lea o Faava ma le fanau e tuueseina lana matafale ae galue o le matua tausi. O se tina e toaga i le lotu ma naunau ia auai i fuafuaga uma e faia e le aulotu e pei o le Faamati, Lotu a Tinā ma lotu a le Pulega. E auai i fono a le aulotu ae faatoa lagona lona leo pe a ou tofia e fai le tatalo e amata pe faaii ai le fono.

O le amataga o Mati 2018 na amata ai ona le toe lotu Faava, ona ua le gafatia lava e lona malosi. O le ma galuega masani o le momoli atu o le Faamanatuga i matua tausi i taeao a o lei faia le lotu, e taunuu atu ua leva ona saofai mai ma ona laei papae e tali

lana faamanatuga. O ona alofaaga ma faamanuiaga e momoli pea mo le aulotu, ou te faaoo mai lava i le taimi o le sauniga. E manatua pea e le Au Leoleo lenei tina aua na te le gafatia ona auai mai i le malulu o le taeao, ae molimoli mai lava lana sene. O se tina tatalo, tina faatuatua, tina alofa, tina faaaloalo, tina fautua lelei; e faaalua ma faailoa i ana galuega ma le soifua tautua o lana fanau.

O le faamanatuga i le Aso Sa muamua o Oketopa, na manao ai e fia auai sei matamata i le Lotu Tamaiti. Peitai, o le Aso Tofi na sosoo ai 11/10/18 na malomaloa ai lona faatafa gasegase i le falemai, na ia faapea mai ai ia maua, 'Ia ua le lava lou malosi ou te alu atu ai e matamata le Lotu Tamaiti. Ae momoli atu ou alofaaga ma faamanuiaga i le Aoga Aso Sa ma le tatou Aulotu. Talofa e, o lona manao ia aua nei faalavelaveina le Lotu Tamaiti, aua na fuli mai lona tua i le taeao o le Aso Toonai 13/10/18 10.30 am a o loma le Aso Sa o le fanau.

O lona Family Service na faia lava i lona maota i Manurewa 15/10/18 i le 7.30pm. O Lauava Pala Me Fale (AF) sa faitau le Tusi Paia ma faia le le tatalo, a o au sa ta'ita'i ma fai le upu faamafanafana. Na molimau fanau a fanau ma le pese aualofa. O le Aso Lua 16/10/2018 i le

O E UA FAI'ILAGI LE FOLAUGA



**KATELINA
SCHWENKE FIU**



**IMOASINA
FAATONU**



**FAAVA FEILOIVAO
VILIA TUIGAMALA**

FAAVA FEILOIVAO VILIA TUIGAMALA

10.30am na faia ai ona toe sauniga i le Ligaliga Funeral Parlour. Na momoli atu i totonu lona sa e Filemoni Tuigamala (FS), o Tuiloma Rocky Tuigamala (AF) sa na faitauina le Tusi Paia, o Lauava Pala Me Fale (AF) na faia le tatalo, a o a'u sa ta'ita'i ma fai le upu faamafanafana. O Robetta Siilata, Sina Brown ma Muaau Vaamao Tuigamala sa molimau e fai ma sui o lana fanau e toa 10, ua maliliu le toa lua, ao Rowena Tautalaga sa molimau e fai ma sui o grandchildren e 34 ma greatgrandchildren e 26, ma la'u molimau faaleagaga mo le tina. O au sa ta'ita'ina lona sauniga mulimuli i luga o lona tuugamau i le fanua maliu i Manukau.

Malo galue Faava, faafetai tatalo, faafetai mo faamanuiaga mo maua aemaise o le aulotu.

O lou Fesoasoani mai matou te manana'o iai. O le la pese faaiu lotu lea ma si ana pele o Tuiloma.

'Tou te le iloa ea, ua maliu le alii tele i lenei lava aso i Isaraelu?' 2 Samuelu 3:38

Manuia lau malaga Faava.

**Tone Leituala (FS)
EFKS Mangere Bridge
Pulega Maugakiekie
Matagaluega Aukilani**

Mafaufauga i le Aso o Tama

mai le itulau e 13

tina, e manatua ai mea sa la faia a o tatou laiti. Le fai ma'umaga, togafa'i, toga koko, le fagota ma ta'ifee pe tui sea, pe tolo gau, ma le lotu taeao poo le afiafi, ma tatau le ta'inamu ma fufue namu a o sii atu ta'ita i totonu o lota moega. Ta te moe e le popole i se mea, o lea e iai tama ma tina e tausia ta'ita.

O se tasi o mea ou te manatua ai pea lo'u tina ma lo'u tama, o le koniseti a le matou nuu sa fai i le malae i luma o lo matou fale i Leusoalii, i le mea lea ua oo mai iai le sami ma ua aloalo atoa i nei aso ma fana tu'u'u ai tamaiti. O le tauluga na siva ai lo'u tina ae alu atu lo'u tama 'ai'aiuli ai. Sa usu le pese - "Lo'u sei e! Le pale auro e..." Ou te manatua, i la'u vaai i lo'u tina, e ese le aulelei. Ua atili ai lava ona siva mimita lo'u tama ma tatafiti. Ae ou te faanoanoa, e oti lava si o'u tina, ou te le'i fai lava iai, "Mum, e ese lou aulelei o

e talavou!" I ia aso ua patupatu o la tama'ilima i le gugu, ma sinasina o la laulu ua matutua. O nei aso, a ui atu nei la'u taavale i Leusoalii, e tau atu i le mea na ta ai le koniseti, ona ou manatua lea o le siva a lo'u tina, ae 'ai'aiuli lo'u tama ma isi tagata. Ou te talitonu na mimita lo'u tama i le aulelei o lona toalua, a o usu le pese. E maligi o'u loimata pe a ou manatua. Talofa e! Talofa e! Pe a toe mafaufau atu iai! I lenei vai taimi ua pulapula-a-la-goto le la oleola. Ua patupatu foi o'u tama'ilima epei ona ou vaai i lima o o'u matua. Ua ou toaina foi a'u e pei ona matutua foila'ua ila aso na ou mua'i faalogo ai i le pese:

"Lo'u sei e! le pale auro e, le maa taua sa faalilo e, ole upu ua tonu, i lo'u lotu e, ole uo moni, ele galo e."

Se'itoe usu mailava le pese o le koniseti manu e le'i gotolela!

***Salt is the only rock
humans can eat.***